


UTL AT DOWNSVIEW



D RANGE BAY SHLF POS ITEM C
39 10 10 06 12 009 2

DR
559
E28

Ebūbekir, Merzifonlu
Vak'a-i cedīd

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

وقعہ جدید

مؤلفی

اندرون ہمایون ناظری مرحوم ابوبکر افندی

ع . ف : ۱ . ر

استانبول

۱۳۳۲

طب و فن کتابخانہ سی

by Ebu Bekr
Efendi

Vakı; cedid.

İstanbul,

1332 A.H.

A.G. Ellis
13.7.26.

وقعه جدید

Ebübekir, Merzifonlu, d. 1835
Vak'a-ı cedid

مؤلفی

اندرون هایون ناظری مرحوم ابوبکر افندی

— — — — —



ع . ف : ا . ر

استانبول

۱۳۳۲

طب و فن کتابخانه سی

DR
559
E28



1026084

طبع ونشر ايتديكمز اشبوكتابجه آثار نادره دندرد.
مؤلف رساله نك نهايتنده كنديني « بواحقر پر قصور
السيد ابو بكر ظهور وقعه جديدي بوجه محرر انشا
وتسطير وتحرير ايتمكه » ديه بيان ايدىيور . بو ذات
سلطان محمود خان ثانی نژدنده درجه نهایده موقر
ومحترم بولنان مرزيفونلى ابوبكر افنديدر . لاديقده
مدفون سيد بلال اولادندن سيد احمد سلاله سندنرد.
پدرينك اسمى سيد محمد اغادر . عموجه سى سلحدار عبده
آغادر . اندرون هايونه دخول ايدرك خزينه هايونده
باش قوللقجى اولمش ، بعده سرچوقه دارلغه ارتقا ايتمش
ايدى . ۱۲۴۳ سنه سنده وظيفه سندن عفو ايله برابر بلا
خدمت مابين هايونده ابقا ايدلمش ايدى . برسنه صوكره
قهوه جى باشى ، متعاقباً خزينه هايون كتخداسى اولوب
۱۲۴۷ ده بالمله اندرون هايون مستخدمينك ضابطى
اولان سلحدارلق منصبك الغاسنده اندرون هايون
ناظرى نصب اولندى . ۱۲۵۱ سنه سى رمضانك يكرمى

ایکنجی بازار کونی وقات ایلدی. ایوبده مهر شاه والده
سلطان عمارتی پیشکاهنده مدفوندر. سجل عثمانی صاحبی
« عالم ، عاقل ، صادق » اولدیغنی بیان ایتمشدر .

بو کتابجه نك المزده کی نسخه سی اوفاق قطعه ده
اون بشر سطرلی قرق ایکی صحیفه دن مرکبدر . اورته
بر تعلیق یازی ایله تحریر اولمش اولوب نسخه یکانه اولمسی
و محررینك خط دستيله محرر بولمسی محتملدر . نهایتده کی
« فی ۷ حا سنه ۱۲۳۴ » کتابچه نك تاریخ تحریری اولمیلیدر .
یکیچریلری بیان ایدر ایکن اسمارینه دائماً « دلاور لر »
صفتی تردیفی کی بعض قیودات دخی بوکا دلالت ایدر .
وقعه جدید دولت علیه عثمانیه نك ۱۱۸۲ سنه سندن
۱۲۲۸ سنه سنه قدر اولان احوال عمومیه سنه دائر خلاصه
تاریخیه اولوب مخرطه طرزنده قلمه آلمشدر . دقتله
مطالعه اولنوزسه داخلی و خارجی احوال عمومیه دولتک
حکایه سنده انتظامه پك زیاده رعایت و دقت ایدلدیکی
وبونکله برابر دیگر تاریخلرده کوریه میان خیلی ناشنیده
معلوماتی جامع اولدیغنی تظاهر ایدر . از جمله صنوف
عسکریه نك تعلیم و تعلمسز بر دیرتی حالی اکتساب
ایتملرینه عائد اسبابی بیان ایدر ایکن « یدلرنده اولان
اسامیلر یله وقت حضرده کندیلرینی اداره ایده مدکلرندن »

طولای عسکر لکله برابر ضایع و تجارت ته توسل و مشغول
اولد قلیخی بیان ایدیور . واقعا دولت علیه نك اوائلنده
یکی چری و سائر صنوف عسکریه یه تخصیص اولنان علوفه
یومیه او زمانه کوره اولدجه یوکسک و هر بر حوایجی
تطمینه کافی درجه ده ایسه ده مؤخر آ اچه نك قیمتی جسته
جسته تنزل ایتش ، حالبوکه علوفه مخصوصه حالیه قلمش
اولدیغندن عسا کر تأمین معیشت ضمانتده صنعت و تجارت ته
سلوک ایشلرایدی . حکومتجه نه بونك اوکنه کچلمش ،
نه ده علوفه لرك احتیاجه کافی درجه ده تزیدینه اعتنا
قلمش اولدیغندن بوجهت ضبط و ربط عسکرینك خللدار
اولسنه سبب ویردن خصوصاً تدن بری و باشلیجه سی
اولشدر .

سلطان سلیم خان ثالث دورنده نظام جدید عسا کرینك
تنظیمیه بونلرك ماهیه لرینك تأمین ایچون اجرا قلنان
تدابیر مالیه نك اداره سابقه نك دوامندن مستفید اولانلرك
اغبرارینی و تدابیر مذکور نك موجب اولدیغی تزید
تکالیف ایسه اهلینك حکومتدن خوشنود سزلغنی موجب
اولدیغنی دخی پك کوزل تعریف و توصیف ایتکده در .
بونکله برابر روم ایلیده طاغلی اشقیاسنك ظهورینی بو
اغبرار و نفرت اهالی یه عطفی دخی دیگر تاریخلرده یوقدر .

فرانسه‌نك اعلان جمهوريتدن اعتباراً دولت عليه
 حقنده اتخاذ ايتديكي سياستى و بونك نتيجه مضره‌سى
 اوله رق مصر مسئله‌سى وقوع بولدينى وانكلز دونماسنك
 استانبول اوكنه ورودى كې حادثه‌لر سر نماي ظهور
 اولدينى حاليده رجال دولتك بو پوليقيهي تعقيدن
 فراغت ايتدكلرينى و كتخدای صدر عالی ابراهيم بسيم
 افندى كې بعض ذواتك دولتى انكلز پوليقيه‌سنة تقريبن
 افكارينك نه صورتله نتيجه‌سز قالديغنى بيان ايدر .
 فرانسز سياستى يالكلز امور خارجيه‌ده دكل امور
 داخليله دخی تأثير ايتديكنى بروجه آتى يازمشدر :
 سليم خان ثالثك خلمى و سلطان مصطفى خان رابعك
 عليه دن جلوسى اوزرينه «فرانسه ايلچيسى مارالذ كر استانه
 قرارى فراره تبديل واثناي راهده روسجغه داخل
 و علمدار مصطفى پاشا ايله ملاقات و جبلت اصليه‌سنده
 اولان كلام فاسده‌لر ايله اغفال و حادثه‌لره سبب مستقل
 اولوب » افاده‌سى دخی هيچ بر تاريخده كوريله‌ميان
 ناسينده بر قيدردر .

امور داخليله اولدينى كې امور خارجيه‌ده دخی
 علمای طريقك فوق العاده تعصبى و بونلرك رجال دولت
 ايله وقوع بولان منافرت شديدلرينك دولتجه حاصل

ایتدیکی تأثیراتی دخی جابجا نظر دقتی جلب ایدم جک
درجه ده کوستر مشدر .

غایت ساده و صاف دلانه افاده لرله حقیقت تاریخیه یی
فوق العاده تصویر ایتدیکی کبی تعریف اشخاصده دخی
اولدجه مهارت کوستر مش و برایکی کله ایله ماهیتنی بیان
ایلمشدر .

*
* *

وقعه جدیدی بزه اهدا ایتمک لطفنده بولنان ارباب
معارفدن حاجی بك زاده احمد مختار و بوکا دلالت ایدن
مدوح شوکت بکله بیان تشکری وظیفه دن عدایلرز .







سلطان سليم خان ثالث

Sultan Sélim III

وقعه جديد

حمد بی حد اول خالق الموجودات ورب المخلوقات
وصلوة وسلام فخر عالم سید الرسائل و صاحب الايات
بیناته وال واصحاب ذوی السیادة والسعادة وازواج الطاهراته
اولسون که اشہود دولت علیه ابدی الدوامک شعشعة الایشی
وشوکت و سلطنت ستایشی آنجق شریعت احمدیہ انقیاد
و اطاعت و احکام شرعیہ نک اجرایی خصوص لرینہ اقدام
واهتمام شاهانہ لرندن و مایہ اصلیه آل عثمانیہ درکار
اولان عدل و عدالت و عامہ ناسہ کمال شفقت ملوکانہ لرندن
ایجاب ایدوب (ثبات الملك فی العدل) مفہوم منجہ ہر نہ قدر
الام و اکدارہ گرفتار اولنور ایسہ دخی شعاع اسلامیہ
ایلہ ماہ تابان و شمس درخشان مثل لویرتو انداز و بعنایت اللہ
تعالی خسوف و کسوفدن صافتر و معرا و سایہ ساز اولوب
بوفرو شوکت و سلطنتہ و حوزہ حکومت شہنشاہیدہ
آسودہ اولان بلاد و مملکتہ دول نصارا غبطہ و حسدہ
اغاز ایلہ دولت علیه نک آرایش و استراحت لرینی جابجا ترک
ایتدیر مک و کندو ایشلرینہ رایج و یرمک غوغاسیلہ اوچ

وبش سنده بر کره تکلیف مالایطاق بیراق کوستروب
 بالضرور سفر ایتک لازم کلدیکی نمایان بیکوز سکسان
 ایکی تاریخندن برو وقوع بولان اسفار هایونلرده جنک
 آور اولان درگاه عالی یکچریلری و سپاه و سلحدار
 و بلوکات اربعه وجبه جی و طوپچی و سائر صنوف
 عسکرینه نک یدلرنده اولان اسامیاریه وقت حضرده
 کندولرینی اداره ایدمه مدکرندن تعلیم و تعلیمی مدت
 وفیره درکه ترک و کار کسبه تمیل و قحط و غلا حبسیله
 صنوف عسکریه ده اسلحه بولنیوب بر تقریب یدینه
 کیرسه دخی فروخت و کارلرینه مشغول و کندولرینی
 اداره ده دوشدکلری و کفاره مقابل اولدقارنده عدم
 مهارتلرندن جنک و جدالده پایدار اوله میوب عساکر
 اسلامیه منهزم و بوتقریب کفار خاکسار بلاد اسلامیه دن
 قتی وافر ممالیکی استیلاز ویدمنه حوسه سه کرفتار و سکنه لرینی
 اسیر ایلدیکی و عساکر مذکورلر مرور ازمنه ایله شیرازه
 نظامدن انفکاک و خروج و مجدداً نظامه ادخالی امر عسیر
 اولدیغندن عساکر مذکورده دن بشقه مجدداً مقابله
 بالمثل معلم عسکره محتاج اولدینی و اول امرده الزم
 و لوازمات محاربه دن اولان طوپچی نفراتلرینی ترتیب
 و مهماتی تنظیم و سفر و حضرده تعلیم ایتدیره رک فتنده

مهارت حاصل ایلوب بعده توفنك انداز عسا کر ترتینه
 مباشرت اولندقدہ دولت علیہنك اقصای مراملرینہ اطلاع
 حاصل ایدہ میوب بیشعور آدملر حسن و قبحنی فرق ایتیمہ رک
 او جاقلو طرفندن واحاد ناس طرفندن مستکره کوروب قیل و قاله
 باعث اولدی ایسه دخی عسا کر مذکورک تکشیری خصوصنه
 اقدام و صرف انظار ملوکانه اولندقجه آناطولی و روم ایلی
 اھالیسنك تکلیفاتی متزاید و سکنه سی تحمل ایدہ میوب
 پراکنده و پریشان اولدینی و نظام جدید عسا کری
 ترتینه مباشرت اولندقدہ ماہیہ لرینك و لوازماتلرینك
 تنظیمی و ادارہ سیچون قتی وافر کسانك ایرادینہ و مدار
 معاشنه و تیمار و زعامتنہ خلل طاری اولوب بوتقریب
 روم ایلیدہ طاغلی اشقیاسی ظہور و مدافعه سیچون
 وزرای عظاملری مأمور و طاغلی اشقیاسی قضا
 و قصبه و قرایہ دخول لرندہ مأمور اولان وزیر بولندیغی
 محلدن حرکت و طاغلی اشقیاسنك اوزرینہ هجوم و بر
 تقریب فرار ایتدیردکده طاغلی اشقیاسی فقرایی تراش
 ایدرکی غارات ایلدی ایسه مأمور اولان وزرانك عسکری
 برقات دخی پرداخ ایله فقرانك مغدوریتلری قات
 اندرقات اولدینی و مسندلردہ بولنان رجال و کبار بو وسیله
 ایله جلب مال سوداسنه دوشدکلی و فقرانك شکر

وشکایتلری عندلرنده مساوی ویکسان اولوب بر درلو
 استماع اولمدیغی وانجام کار روم ایلی حوالیسندہ طاغلی
 اشقیاسنک تسلطندن و آناتولیده نظام جدید عسا کرینک
 کثرت و فرتندن روم ایلی و آناتولی اہالیسنک راحتلری
 کلیاً مسلوب و بو تقرب نفرت و قوعی و شان شوکت
 آل عثمانیہ نک دأب درینہ مستحسنہ لرنده مندرج اولان
 مرحمت و عنایت اعلا و ادنی و بای و کدایہ و عامہ ناسہ
 مبذول و بیدریغ اولدینگی رایکان و علی الخصوص دول
 نصارا ایلہ مصالحہ یہ رغبت اولندقدن صکرہ ہر بر
 خصوص لرینہ من کل الوجوہ مساعدہ و مساعدہ و کویا
 بینہ مادہ محاربہ و مقاتلہ اولنماش صورتلرنده اعتبار
 والتجاری نزد شاهانہ قدوہ قبولہ قرین و تسویغ سنت سنہ
 و عادت قدیمہ مستدیمہ دولت علیہ دن ایسہ دخی دول
 نصارادن کندو ولی النعمتلی اولان قرال لرینگی تلف
 واضاعہ ایدن کافر بدبخت و خائن دین و دوات اولوب
 فرانسه لونک جمهور باشیسی اولان پناپورطہ نک مصر
 قاہرہ کی بی بر اولکئہ معظمہ یہ علی الغفلہ هجومیلہ استیلا سی
 و دولت علیہ یہ خسارات کلیہ سی واضح و آشکار ایکن
 خیلہ کار خونخوار بیشمارک ینہ قول کاذبہ سنہ اعتماد و بر
 تقرب ملوکہ استناد حاصل و اعتبار ایلہ جملہ دولک اوزرینہ

ترجیح اولنوب کویا بوکافر بدکار قهرمان قاتل ورستم
 زال وزمان دعواسیله جمیع دولی قبضه تصرفه آلمق
 عندنده لاشی قیلندن عد ایدوب فقط دولت علیه ایله
 بنابورطه دولتی اولمق وبوایکی دولتن غیری جهانده
 دولت الفاضلی یاد اولنماق خلیاسنه دوشوب دولت
 علیه دن مهمات و ذخائر خصوص لرنده اعانتدن غیری
 مطالبه سی اولیوب روسیه لو اوزرینه دول سائره کبی
 هجوم وید کفاره کرفتار اولان مملکت لری اخذ و مفت و مجاناً
 دولت علیه تسلیم ایلک دام تزویری ایله کندو ایشلرینه
 رایج وبو تزویرات ایله شیطان الوسواس مثللو دوات
 علیه نک عروقلرینه حلول وبو حیله کار بد اطوارک قول
 فاسده سی روسیه لویه معکوس وبوقول کاذبه سنی بلکه
 دولت علیه نک اعانتی وقوت قاهره سیله فعله چیقاریر
 ملحوظیله هر نه قدر قرال قاعده سنه منافی وعهد نامه لرین
 خلافی ایسه دخی فرانسه لوی دولت علیه نک اعتبارندن
 اسقاط و ایلچیسنی دفع اولنسی چون علی الغفله مسقولو
 بندره و حوتینه کلوب قلعتین مذکور تینی خیل سنکین
 و دلفریب متین ایله ضبط و تسخیر و قلاع خاقانیله ره دخول
 و استیلا خبری محافظ لری و سکنه سی طرفندن باعرض
 و محضر دولت علیه اطاره و تسیر و بو خبر نامعقول

ورودنده بو مثللو حرکات نا برجا ملاحظه دن امر بعید
 اولدیغندن جمله ناس مایوس و باب عالیده مشورت کبرا
 ترتیب و بوتقدیرجه روسیه لو اوزرینه سفرا تملک شرعاً
 مقتضی و ایجاب و مسقولو بالیوزینه جواب ویریه جکی تحقق
 و بدیدار اولدقده کتخدای صدر عالی بولنان حوتینلی
 ابراهیم بسیم افندی قوینندن انکلترونک روسیه لو خصوصه
 دائر قرق کونه د کین مهمل طلبی و هر نه که ضایعات و تلفات
 اونش ایسه تضمین و قلاع خاقانیه مذ کوره لردن اخراج
 ایاه دفع غائله اولمسنی تعهد ذمیننده بر قطعه تقریری اعلان
 و علناً ارباب شورایه قرائت ایلد کده مجلس شوراده بولنان
 شیخ الاسلام اسعد افندی زاده عطاء الله افندی حضرت تلی
 و صدرین عصمت بک افندی و شمس الدین افندی و سائر
 موجود صدور کرام اسبق حضراتی غضوبانه بسط
 مقاله سراغاز ایلوب بویله و بویله بو کافر لره رخصت
 ویره رک مملکت لری ید کفاره کرفتار و سیزک کبی آدم لر
 بو مسند لرده بولندیغندن بو خساراتلر اوله یور دیوب
 مناقشه و تکدیر صورتلارنده ناهمواره کلاملر ایله قیل و قال
 و انکلترونک تقریری خام ارمود کبی ابراهیم کتخدانک
 بوغازینه ادخال ایلدیلر و روسیه لو اوزرینه سفریمز سفردر
 دیوب شرعاً جواب ویرد کلرنده انکلترونک لو دخی روسیه لو

ایله اتفاقه مبنی بالیوزلری برابرجه سفینه‌یه مرکوباً بحر
سفیده متراهی اولدیلر انجق بوخصوصده علماایله رجال
و کبارک بینلرنده نفاق و نفسانیت حاصل و بربرینه کچر و
ادا و نفسانیتلرینی اجرا قصدینه دوشدکلری و بحسب الاقتضا
بیك ایکیوز یکرمی برسنه‌سی ذی القعده سنک اون یدنجی
کونی باب عالی‌یه طوغ پر فروغ رکز و نصب و مسند صدارت
عظماده بولسان وزیر آصف نظیر ابراهیم حلمی پاشا
حضر تلمری تدارکات سفریه‌یه مباشرت و ممالک محروسه‌یه
اوامر نشر و عساکر جلبه و مهمات تدارکانه اقدام
و اهتمامده ایکن سنه مذکور سنک ذی الحجه سنک اون
اوچنجی کونی انکلتزه لونک اون بر پاره سفینه‌سی حکمت
خدا شدید روزکار ایله بحر سفید بوغازندن مرور و عبور
و مدینه اسکداره تابع قنار بغچه‌سی تعبیر اولنور مسیره کاهک
جوارنده اطهرلر پیشگاهنده لنگر انداز و ظهور ایلدکده
در عقب آستانه علیه‌نک ساحل بحرلری و اسکله‌لرینه
طایبه‌لر انشا و طوپ و خمیره‌لر وضع و رجال و کباری
تعیین و دوغتمای همایون سفاینلرینی حاضر و آماده و مهیا
و آستانه علیه‌نک سکنه‌سندن مسن و اختیار و توانا و حرب
و ضربه مقتدر و غیر دانا اولانلری درگاه عالی یکیکچری
آغاسی بولنان پهلوان اغا پر سلاح ایدوب معرکه‌یه مترقب

و بر قایق نفر دلاور لر خفیجه کفار کسینه لری جوارندن
 اسیردخی اخذ ایلدیلر و فرانسه ایلچیسی طایبه لر انشاسنده
 واقتضایدن محالره طوب و خمیره وضعنده برابرجه کزوب
 صداقت یوزندن بو تقریب قریبت شاهانه حاصل و کونا
 کون کلام فاسده لر ایله اغفال ایلدی ایسه دخی مومی ایله
 ابراهیم کتخدا و رئیس الکتاب انکلیر محمود افندی سفاین
 مرسوملرین ظهورینک اون برنجی کیجه سی مومی ایله
 محمود افندینک قاضی کوینده کائن ساحلخانه سنه واروب
 انکلتره نک قومانداری اسمیت دیدکلری جنرالی جلب (۱)
 و دأب دولندن اولیان حالاته قصد و تصدی ایتک
 تعهد نامه لرین خلافی اولوب بودعوان فراغت وعودتنه
 دائر مکالمه و کلام لین ایله استجلاب قلوب ایدهرک
 فرداسی کونی طرفیندن طوب و توفک انداخته
 اولق سزین سحری پوپا یلکن حرکت و بحر سفیده
 متراهی ورجعت ایلدکده بناپورطه یکنی اولوب فرانسه لو
 ایلچیسی اولان جنرالک (۲) اغفال و ابرام و الحاحیه

(۱) آمیرال سمیت ایله ابراهیم کتخدانک قاضی کوینده کی
 انکلیر محمود افندی ساحلخانه سنده اجرا ایلدکلری بو ملاقاته
 دائر تاریخلری مزده بر قید کوریله مدیکی جهتله حائر اهمیتدر .
 (۲) فرانسه سفیری جنرال سباستیانی ناپولیون بوناپارطک
 افراسندن ایسه ده یکنی دکادر .

بحر سفید بوغازنده قپودان دریا صالح پاشانك دونمای
 هایونی محافظه ایدهمیوب انکلترو لویه احراق بالنار
 ایتدیرمشیکن طوغلری رفعیله اکتفا و بوغازده مهمات
 نظارتنه مأمور دفتردار سابق فیضی افندینك قتلنه (۳)
 فرمان قضا جریان و اصدار ایتدیردیکی و سالف الذکر
 حرکات و وقوعات بروجه آتی ذکر و تفصیل اولنه حق
 حادثه لرین اسباب ظاهریه سی و موجب منشائی اولدینی
 مستغن عن البیان اولوب رجال و کبار ایله موالی عظام
 بیننده منافسه مضر و کچر و رفتار درکار اولغله بناء علیه
 (اذ اراد الله شیئاً هی اسبابه) مزایاسی اوزره چار ناچار
 بیك ایکی یوز یکر می ایکی سنه سی محرمنك اون سکننجی
 کونی یکچیچری اردوسی و اون طقوزنجی کونی جبه جی
 و طوپچی و عربه جی و اردوسی و یکرمنجی کونی سجاغ
 شریف ایله سپاه و سلاحدار و بلوکات اربعه اردوسی
 و وکیل سلطنت و سردار اکرم ابراهیم حلمی پاشا

(۳) فیضی افندی نظام جدید طرفدارلرنددر. بوغازاستحکا -
 ماتنده آغر داورانسی سر رشته سیله اعدام ایدلشددر. اک
 اک بیوک مأمور مسئول اولان قپودان پاشانك یالکز طوغلرینك
 رفعیله اکتفا اولدینی حالده بو ذاتك احساسنك سبب حقیقیدی
 آرز زمان ایچنده ترقیسی قدمای رجالك کوجلرینه کیتمکله حقنده
 نفرت عمومیه یی استجلاب ایلریدر .

حضرتلری داود پاشا سحر اسنه نصب حیام و تحریک
 لکام ایله یکیشهرلی بوی قیصه صقالی کوسه درونی فتنه
 و فساد موسی پاشای موسی الیه ابراهیم کتخدانک تعریف
 و التماسیه قائم مقام عالمقام نصب اولندی . استعید بالله
 (وان لیس للانسان الا ماسعی) ماصدقی (اذا جاء القضاء علی
 البصر) منطوقی اوزره شوکتلو مهابتلو پادشاه عالمقام
 حضرتلرینک و مسند علیالرده بولنان رجال و کبارک اقصاب
 مرا ملری و جایکیر درونلری اولان خصوصی اظهار ایله نظام
 جدید عسا کرینه تقویت ایچون علی روایت سکسان بیگ قات
 نظام جدید البسه سی تنظیمنه اراده شاهانه تعلق واردوی
 هایون ادرنه یه وصول و حقوق خبری ورودنده البسه
 مذکورک الباس اولنسی تصمیم اولندینی شیوع و کیف
 ماتفق ماه ربیع الاولک اون دردنچی جمعه کونی سلامتده
 سکبان باشی اغایه خطاب ایدرک یکیکچری قشالارنده
 و قوللقلرده نفراتک قلی وار اسکدارده ولوند چفتلکنده
 اولان عسا کر شاهانه می قشالاره و قوللقلره وضع و تعیین
 اولنسه کوزل اولور و جمعیه بادی اولور دیو نطق
 هایون صدوری و سکبان باشی اغادخی اردوی هایونه
 تحریره محتاج در دیو جواب و یردیک و ماه مذکورک یکرمی
 بر جمعه سنده عسا کر شاهانه تعبیر اولنور و نظام جدید

عسا کری ایله سلاملغه تشریف هایون اوله جفی بین الناس
 شایع واحد ناسک کوش هوشلرینه القا اولوب (البلاء
 مؤکل بالنطق) مؤداسی اوزره ناطولی وروم ایلی حصارندن
 قره دکز بوغازینه وارنجه کرك قلعه نفراتلری وکرك
 یرلوسی نظام جدید عسا کرینه داخل اولسونلر و نظام جدید
 لباسنی کیسونلر مخالفت ایدر اولور ایسه براقسون مملکتلرینه
 کتسونلر صورتنده بیاض اوزره فرمان صدور و بوستانجی
 باشی شا کر بکه تنبیه و مأمور و بر مقدار البسه بحر سیاه بو-
 غازینه مأمور رئیس الکتاب سابق انکلیز محمود افندی یه ارسال
 و بوستانجی باشی مومی الیه دخی قلاع خاقانیه لرده موجود
 ضابطانه فرمانی ارائه و اراده شاهانه بی یکان یکان افاده و ابرام
 و ضابطان دخی ناچار اباس مذ کوری کیمیه تعهد و نفراتلرینه
 اعلان و اخافه ایلد کړنده ضابطان دن حصکی خلیل اغایی
 و حصار دزدارینی نفرات منازعه ارمسند ربيع الاولک
 اون یدنجی بازار ایرتسی کونی پشتو و بچاق ایله هلاک ایلد کړنده
 (۴) بحر سیاه بوغازینه مأمور اینجه پاشا و سید محمود افندی و سائر

(۴) انکلیز محمود افندی سلطان سلیم ثالث دورینک الک بنام
 رجالدندر . یوسف اگاه افندی ک لوندره سفارتنه مأموریتنده
 معینه سرکاتی تعیین اولمشیدی . بصره ده انکلیزجه تحصیل
 یلمسی انکلیز محمود افندی دیه شهرتنه سبب اولمشیدی .

مأموران بر تقریب آستانه فرار و نفرات مذکور لر نظام
 جدید البسه سنی تفحص واستفسار وانكلیز محمود افدینك
 نزدنده اولدیغنی تحقیق و محمود افدینك بولندیغنی محله هجوم
 و محمود افدی تاب آور اوله میوب قایغنه مرکوباً فرار
 و نفرات مذکور لر قایق لره سوار و وراسندن وارد قلدند محمود
 افدی بویك دره نام محله چیقوب بر مدت اوسته یرنده اقامت
 و نفرات قارشو سنده اولدیغندن صبر و آرامه تحمل
 ایده میوب حرکت و قشلا نك اوکنده توفنك و پشتوایله هلاک
 ایلد کارندن صکره جمله قلاع نفرا تی بریره جمع ایله نهایتنی تفکر
 و مشورتلری اناسنده اشبو وقوعاتین خبری استانه علیه
 و رود و رجال و کبار بر معتاد باب عالی جمع و مشورتلرنده
 اوجاغی طرفندن ضابطان کیدوب مراملرینی سوال
 و اسکات یکچیری اولملرینی رأی و تدبیر ایلدیلر ایسه دخی
 (المقدر کائن) منطوقی بیت:

نقدر سعی ایدرسن بر مراده

ولی اولمز مقدردن زیاده

دوئنا مستشارلنی ، رکاب هایون بکلکجیلیکی ، رئیس الکتابلق
 کبی پک معتنا مأموریتلرده بولنمشدر . عالم ، کاتب موسیقی شناس
 دکرلی برذات ایدی . جغرافیایه عائد پک مکمل آناری واردره .
 اسکدارده آیریلقی چشمه سنده مدفوندر .

فهو اسنجه تدبير تقديره موافق كليوب اوجاق طرفندن
 كيدن ضابطان و بوستانجى باشى محله وارنجه قدر جمعيتلىرى
 متزايد و بوستانجى باشى بىك بغچه سندن ايلرو كيمه
 لياقتى و جسارتى اوله ميوب بوستانجى باشى اندرون همايونه
 و يكيچرى ضابطانلىرى اغا قپوسنه كلوب جمعيتلىرىنك
 ازدياد اولديغنى اخبار و فرداسى صالى و چهارشنبه كونلرنده
 ينه اوجاق طرفندن ضابطان و اورطه متوليلرى و قره
 قوللقچيان ارسال و باب عاليدن سپاه و سلحداران كتخدا
 يرلرني ايصال و كويا اسكات صورتلرني ملاحظه ايله
 اقدام و اهتمام اولندي حال بوكه موالى عظام طرفندن
 فرصتى غنيمت عد و قائمقام موسى پاشا ايله مخابره و اتفاقاً
 سراى خوجه سى منيب افندي بي حصارده كائن ساحلخانه
 سنه ارسال و نفرات مذكورلر سوزارلرني كيجه حاليله
 جلب و تحريك و علمانك و قائمقام پاشانك اعانتلرني تفهيم
 و رجالدن و مقربان شاهانه دن اون بر آدمك تلف و اعداملرني
 كوشلرينه القا و تقويت و يروب بيشعور مرقوملر دخی
 اولطرفه كيدن يكيچرى ضابطانى ايله يكدل و يكيجهت
 و عهد امان و قليج اتلايوب ينه رجال و كبار باب عالیده
 مشورته و اسكاتلرينك صورتى رأى و تدبيرده اولوب
 و لكن قائمقام پاشا رجال و كبارى واقف اسرار ايتيوب

برابرجه تدبیر واقتضا ایدن فرمانلری تحریر و تعویق
وهرنه قدر تعجیل ایلدیلرایسه بروجہ سهولت اسکا تلیرینه
بقالم دیه رک اصرار وقت ایدوب ماه مذکورک یکر می بشنجی
کیجه سی اول جمعیت ایلہ علمایہ استناداً اوچیوز مقداری
نفرات روم ایلی حصارندن حرکت و کیجه ساعت برده ایکن
بشکطاشه داخل وساعت بشده طوپخانہ یه واصل و طوپخیلردن
وعربخیلردن قزغان اخذ و سحری غلطہ دن علم انداز
قبان دقیق اسکلہ سنہ معونہ لر و قایقلرایلہ مرور و بیراقلرینی
کشاد ایدرک طوغری اغا قپوسنه دخوللرینک خبری باب
عالی یه رسیدہ وینه رجال و کبار باب عالیده ایکن عسا کر
عسا کر مذکور شیخ الاسلامه خبر کوندروب اغا قپوسنه
جلب ایلدکده صدرین و معزوللره باب عالیدن خبر ارسال
و باب عالی یه استجلا ب ایلدیلر یکیکچری دلاورلری شیخ
الاسلامی اغا قپوسندن اوکلرینه قاتوب تعظیم و تکریم ایلہ
طوغری اتمیدانہ کوتوروب میدانده دعوالرینی بیان
و فتوا یه مراجعت و بروفق دلخواه فتوایی اخذ و اون بر
آدمی مطلوب و شیخ الاسلام افندی دخی تعهد و دلاورلرده
بونلردن ماعدایه ضرر و زیان ایتملرینی متعهد و خساراته
جسارت ایدر اولوررایسه بلا امان تلف و اعدا ایدہ جکلرینی
میین بر ققطه حجت شرعی یه ربط و بو عهد امان اوزرد

قربانلر ذبح اولندقدن صکره بزم دعوا من شرعیله دیر و بر
 کمسنیه ضرر و زیانمز یوقدر دیو دلال ندا ایدرک صراج
 خانه دن وجب خانه دن قزغانلر اخراجی چون بر قاج سر کرده لر
 ایله نفرات ارسال و قزغانلری اخذ میدان مذ کوره یه
 ایصال ایلدکلرنده اون بر نفرین دفتری باب عالی یه ارسال
 و صدرین و معزوللری میدان مذ کوره یه مطلوب ایلدکلرنده
 صدور کرام دخی حرکت و میدانه عزیمت و رجال بو
 اطوار دن احوال عالم علوانداز اولدیغنه تیقن حاصل و باب
 عالیدن قراری فراره تبدیل و هربری بر محله کیدوب
 باب عالیده قائم مقام پاشا و کتبخدا بك و رئیس افندی
 و چاوشباشی و علمادن عربزاده عارف افندی و شمس الدین
 افندی قالب دفعه ثانیده میداندن دلاورلر اون بر آدمی
 مطلوب ایچون آدم ارساللنده رکاب مستطابه عرض
 و رکابدن بوستانجی باشی شا کر بکین (۵) سر مقطوعی ارسال
 و بعده رکاب کتبخداسی ممش افندی (۶) ایله رئیس الکتاب صفی

(۵) شا کر بك میر میراندن احمد پاشانك اوغلیدر . اندرون
 هایوندن تفیض ایتشد . طوغانجیلرده مدفوندر .

(۶) ممش افندی آرپه و مطبخ امینلکلرنده و بلغراد قلعه سی
 تعمیرات مأمور لغنده . شق ثانی دفتر دار لغنده ، سلطان کتبخد لغنده ،
 حبوبات نظارتنده بولمشد . مستقیم بر ذات ایدی . ایوبده
 کاشغری یولنده مدفوندر .

افندینک (۷) سرمقووعلر نی ابدست لکنینه وضع وارسال
 وبعده ضربخانه امینی ابوبکر افندینک (۸) سرمقووعنی ابعاث
 وبوسرمقووعلر میدان واریجه فراری مذکورلری حیاً
 مطلوب ایده ریز جوابی ظهورنده باب عالیدن ادملر تعین
 ایله کتخدای سابق حوتینلی ابراهیم افندی بی کلابی اوغلو
 دینور دولکر قلفه سنک یکی قپو خارجنده اولان خانه سنده
 بولوب افتان وخیزان ونیجه نیجه حقارتلر ایله میدان
 مذکوره ادخال وقلیج و بیچاق ایله پاردپاره ایلوب (۹) مهتر
 باشیسی یاروفادار وسداقتکاری اولدیغندن انفکاک ممکن
 اوله میوب انی دخی تلف ایلدیلر وکوسه کتخدا تعبیر

(۷) صنی احمد افندی ارضروملی اولوب دیوان قلمندن
 یتشمشدر. بککجیدکده، رئیس الکتابلقده بولنشیدی. اسکدارده
 مدفوندر. عاقل، عقیف بر ذات ایدی .

(۸) ابوبکر افندی ضربخانه حامللغندن ترقی ایده رک
 ضربخانه امینی اولش جاهل بر آدم ایدی . قرهجه احمدده
 مدفوندر .

(۹) ابراهیم بسم افندی مکتوبی^۲ صدارت سرخلیفه لکنده
 صدارت مکتوبی^۳لغنده ، صدارت ورکاب هایون و بیکیخان
 سلطان کتخدالقرنده بولنشدر. اخلاق حسنه ایله متصف واقف
 امور دولت بر ذات ایدی. افسرای ده توکل حامی جوارنده
 مدفوندر .

اولنان چلبی مصطفی افندی (۱۰) پنجشنبه کیجه سی قبه طاشده
 طاشده کائن ساحلخانه سنده بولندیغندن طوپخانه ده
 جمعیتلرینک دروننه داخل دوشوب طوب و طوب
 عربه سندن و نفراتندن غیری بئم نوایجادم یوقدر دیهرک
 اعذار و دلاورلر دخی اعتذارینی قبول و ضرر و زیان
 ایتیه جکارینی تعهد ایتدیردیکندن باب عالیدن حرکت
 و طوغری میدانه واردیغنده قبانه تعیین و امت محمدک
 اتمکلرینه اتمام و بصیرت ایلمسی تنیه و ارسال و باقی فرار
 ایدن رجال و مقربان شاهانه پنجشنبه کونی بولمیب فرداسی
 جمعه کونی صدرین و معزوللری دلاورلر سحری باب
 عالییه ارسال و اول امرده دعوالرنده و حلیالرنده اولمیان
 جلوس هابونی مطلوب و باب عالیدن امام سلطانی بی اندرون
 هایونه ارسال و اندرون هایوندن انحلال خبری و ورودنده
 صدرین و معزوللر میدان مذکوره یه واروب شیخ الاسلام
 و صدور کرام دلاورلرین اوکلرینه دوشوب دعوا من
 شرعیله در کمسنه یه ضرر و زیانمز یوقدر هرکیم خساراته

(۱۰) مشهور کوسه کتخدا رشید مصطفی افندی در پک چوق
 مهم .أموریتلرده بولندقدن سکره سنی سکسانی متجاوز اولدینی
 حلد طوپخانه ناظری ایکن ۱۲۳۴ ده ارتحال ایلدی. ایوبده
 مدفوندر. ذکی ، فطین بر ذات ایدی.

جسارت ایدرسه پاره وپاره ایدم ریز دیو دلالر ندا ایدرک
 صورت حقدن کورینوب دیوان یولندن شکل حمامک
 اوکندن الای کوشکینک پیشکاهندن ترزیلر کارخانه سنه
 وارنجه مابینجی احمد بکی یمنیجی کفره نک خانه سنده بولوب (۱۱)
 دلاورلرین اوکلرینه کلد کده بلا امان پاره وپاره ایلدیلر
 باب هایونه واروب برمدت باب هایوندن کشاده اولمیوب
 براغوردن استمکز صداسی عیوقه صعود ونهایت الامر
 صغوق چشمه قپوسندن علما ایله قائمقام پاشاندرن هایوته
 کیروب السلطان ابن السلطان السلطان مصطفی خان علیه الرحمة
 والغفران حضر تلیخی تحت عثمانیه یه اجلاس وجلوس هایون
 وقوعندن صکره باب هایونده دعالر اولنوب باب هایون
 فتح وکشاده وبیعت تذر کرملر ارسال وتیزالدن بولنان علما
 ورجال وخدمه شاهانه ایله جمعه کونی ساعت بشده ایکن
 بیعت ودرعقب ایاصوفیه کیره سلامق اولوب جمله ناس
 ویکچیری دلاورلری رأی العین مشاهده ایلدکلرند نصکره
 یکچیری دلاورلری عودت ونفقات قلعه بوغازده سر کرده لر
 میدانه رجعت ایلوب مدینه اسکدارده ولوند چقتلکننده
 بولنان نظام جدید عسا کری بیت :

(۱۱) احمد بک خوتین محافظی خلیل پاشانک اوغلی اولوب
 اعظم رجال اندروندن ایدی. مدنی قاضی کوینده در .

شکست اولسه سراخی جام و مجلس برقرار اولماز
مئلدر سويلنور باش کتسه ايق پايدار اولماز

مز اياسي اوزره کندو کنديلرينه پراکنده و پريشان
وقشله لرده فرد واحد قالمیوب وقت عصرده الحاج
ابراهيم افندی بی ساحلخانه سنک صویولنده بولنوب باب
عالی یه کتوردیلر و چاوشباشی اوطه سنده مکث و دلاورلره
اخبار و مرقوملر چاوشباشی اوطه سندن اخذ و گرفت
وماشیاً دیوان یولندن نیجه نیجه حقارات ایله سلطان
بایزید میداننده چوملکجیلر اوکینه وارد قده حرکت
مجال قالمیوب بی تاب اولدیغنده پاره و پاره ایلدیلر (۱۲) و جمعه
ایرتسی کونی سحری سرکاتی (۱۳) افندی بی اشچی سنک

(۱۲) امور بحریه ناظری حاجی ابراهیم افندی اردو دفتر داری
اسماعیل بکک اوغلیدر. صدارت مکتوبی اوطه سی سر خلیفه -
لکنده، مکتوب ییغینده. رکاب هایون و صدارت کتخدالقرنده،
دفتر دارلقرده، حبوبات نظارتده بواندقدن مسکره انکلیز
دونماسنک استابوله ووردند امور بحریه ناظر اغنه ارتقا یلشدی.
« فن کتابتده ماهر و تدبیر امو ده مثلی نادر اصیلزاده و فطین
و صاحب وقار و تمکین اولوب نظام جدیدک بدایتندن بری اکثر
مصلح و تفرعه سنک مدیر و مدبری ایدیلر » ابوبده کاشغری
یولنده مدوندر .

(۱۳) اسمعی احمد افندی در. اندرون هایوندن تفضله سلطان
سیم نالیک قرناسی و سرکاتی اولوب نزد پادشاهیده فوق العاده
صاحب اعتبار اولمشیدی.

خانه سنده باصیلوب جان خوفیله کیر میتدن فرار ایدیم
 دیر ایکن سوغاغه دوشوب مجروحاً فوت وسر مقطوعی
 میدان مذکوریه ایصال ایلدیلر ونظام جدید دفترداری بولنان
 احمد بك افندی (۱۴) الی الی نك قشله سنه داخل دوشوب
 خلاص اولدی وقپان نا بی افندینك (۱۵) تدریسلكی رفع
 ومیر میرانلق توجیه وبورسیه نفی اولندی ووالده
 کتخداسی یوسف آغا (۱۶) والده سلطان علیة الشان
 حضرتلری دار قنادن دار بقایه رحلت ایلدکن صکره
 حج شریفه اذن آلوب برأ عزیمت وحجاج ذوی الابهاج
 ایله مدینه منوره یه اوچ قوناق قالور مرحله یه وصوللرنده
 جانب حجازده ظهور ایدن وهابی دینور ملحدوملعونك
 طرفدن مدینه منوره مفتیسى کلوب والده کتخداسنه
 ومیرالحاج عبده پاشایه کونا کون خلط کلام ایله اداء
 فريضه حج وعجندن حجاج مسلمینی منع وبيك ايکيوز

(۱۴) احمد بك تشریفات کیسه دارلغنده ، تشریفاتجیلغده ،
 شق ثانی دفتردارلغنده بولندقدن سکره نظام جدید دفتردارلغنه
 نقل ایتمیشیدی . ۲۲۵ . ده صدارت کتخداسی ایکن وفات
 ایلشدر .

(۱۵) اسمی عبداللطیفندر . کجه جی زاده دامادی ایدی .
 (۱۶) یوسف آغا کیریدایدر . سلطان سلیم ثالث والده سی
 مهرشاه سلطانك کتخدالغنده بولندی صره دهده فوق العاده
 اکتساب نفوذ ایلشیدی .

یکرمی بر تاریخنده حجاجدن فرد واحد حج و حج ایتک
مقدر و میسر اوله میوب یدی سنه علی التوالی طریق حج
مسدود اولمغله والده کتخداسی آغای مومی الیه حجاج ایله
عودت و یکرمی ایکی تاریخنده وقعه دن صکره اثنای راهدن
بورسیه نفی واجلا اولندی و قلعه سر کرده لرینی شوکتلو
افندمز اوچ کون میدان مذ کوره مسافر ایدوب جلوس
هایونک اوچنجی بازار کونی درت نفر سر کرده لره یومیه لر
و کورکلر و نفراته یومیه لر و عطیه لر احسانیه مکرم و ملتفت
اولدیلر و کوسه تعبیر اولنور چلبی مصطفی افندی ترسانه
امینی و حسن تحسین افندی (۱۷) رکاب کتخداسی و حالات
افندی (۱۸) رئیس الکتاب و سید محمد افندی (۱۹) ضربخانه
امینی نصب اولندی و ربیع الآخر ک غره سی بازار کونی والده
سلطان آلائی و ماه مذ کورک بشنجی پنجشنبه کونی قلیج

(۱۷) حسن تحسین افندی مالیه دن یتشمشدر . شق اول
دفترداری، دفتر امینی، رکاب کتخداسی؛ چاوشباشی، روزنامه
اول، نشانجی، قلاع خلاقانی مفتشی، ۱۲۴۲ ده تکرار نشانجی
اوله رق او خدمتده ۱۲۴۵ ده ارتحال ایلدی. ایوبده مدفوندر.
(۱۸) ۱۲۳۸ ده قونیه یه اعزام ایله افنا اولنان مشهور
اتا بک سلطنت محمد سعید حالات افندیدر . یتیمی افندی تکیه سنده
مدفوندر .

(۱۹) سید محمد امین افندی اندرون هایوندن یتشمشدر .
بر طاقم مهم مأموریتلرده بولندقدن صکره ۱۲۴۰ ده وفات
ایلمشدر . اسکدارده مسکینلرده مدفوندر .

آلائی اولوب و ماه مذ کورک اون سکزنجی کونی والده
کتخداسنک سر مقطوعی ویکرمی دردنجی کونی قبان
نائبک سر مقطوعی ورود و بونلردن ماعدا فردواحد
تعدی و تسلط اولمیوب عدالت صورتند حرکت و بر
توفک انداخته اولمیهرق و طائفه نسوان و صبیان چارشو
واسواقلرده کشت و کذار ایدرک ا کرچه جلوس هایون
واقع اولدی آنجق عسا کر مذ کور هرنفدر صورت
حقدن کورندیلر ایسه دخی بو حادته حسبیله فرجه یاب
ودائرة اطاعتدن خروج ایله آستانه علیه ده اختلال منقطع
اولیوب کونا کون تکلیفات نابرجایه تصدیلری و شیخ -
الاسلام عزلی ایجاب ایلد کده فرداسی کونینه شیخ الاسلامی
ابقا ایتدیرملری و قائمقام عزلی ایجاب ایلد کده چاوش
باشی حمده بک قائمقام اولمشیکن قرق کون مرورنده
ینه موسی پاشایی قائمقام ایتدیرملری و بونلرین امثالی
حرکات نامرضیه تصدیلری و دست تطاولاری حدی
تجاوز ایلوب بوخلالده فرانسه ایلچیسى (۲۰) مارالذکر

(۲۰) فرانسه سفیری جنرال سباستیاننک فراری و روسبقده
علمدار مصطفی پاشا ایله ملاقاتی حقنده تاریخلریمزده معلومات
یوقدر . هر حالده بک مهم اولان بوقفیه مؤرخلرمزک جلب
نظر دقتلری و طیفه دن عد اولنور .

آستانه علیه دن قراری فراره تبدیل وائسای راهده
 روسیجغه داخل و علمدار مصطفی پاشا ایله ملاقات
 وجبلیت اصلیه سنده اولان کلام فاسده لر ایله اغفال
 وحادثه لره سبب مستقل اولوب عسا کر مذ کورک بو وجهله
 تغایانه حرکتلری شوکتلو اقدامی تعجیز و تصدیع
 ایله طرف شاهانه دن بونلرین حاللرینی بیان ایدرک
 اردوی هایونک آستانه عودتی و متغلبه لرین
 تعدیلرینی منع و دفعی صورتنده اردوی هایونه بر قطعه
 خط هایون ارسال واردی هایونده بولنان رجال و کبار
 خداوندکار سابق سلطان سلیم خان حضرتلرینک
 کرم دیده سی اولدقلرندن مجدداً تحت عالیبخت عثمانیه
 اجلاسک تداییرینی مشورت و روسیجقلی مصطفی پاشایی
 دخی اردوی هایونه جلب و شوراده بالاتفاق خداوندکار
 سابق تحت عثمانیه اجلاس ایتدیرملرینی قول و قرار
 وعهد و امان ایله علی الغفله ادرنه دن اردوی هایونی اخراج
 و قلاع نفراتنک سر کرده سی اولان قباچجی تعبیر اولنورغدار
 بد اطواره اردوی هایوندن الحاج علی آغانمنده بردلاوری
 ارسال واردوی هایون آستانه وصولندن مقدم حصارده
 ساکن اولدینی خانه سنده خفیجه قتل و اعدام ایلدیلر
 واشبو بیک ایکوز یکر می اوچ سنه سی جمادی الاولنک

یکرمی بشنجی صالی کونی ادروی هایون. داود پاشا
 صحراسنه داخل و آلا یایله لواء شریفی اندرون هایونه تسلیم
 وروسجقلی علمدار مصطفی پاشا داود پاشا صحراسنده
 اقامت و صدر اعظم چلبی مصطفی پاشا حضرتلری
 جمادی الآخرک دردنچی پنجشنبه کوننه دکین مسند
 صدارتده استراحت و یوم مذ کورده علی السحری علمدار
 مصطفی پاشا یاننده اولان عسا کرایله داود پاشا صحراسندن
 حرکت و تحریک لکام ایله باب عالی یه داخل و مهرهایونی
 چلبی مصطفی پاشا دن اخذ و چاوشباشی آغا ایله رکاب
 مستطابه ارسال وبعده شیخ الاسلام بولنان عرب زاده
 ونقیب الاشراف دری زاده بی احضار و کتخدای صدر
 عالی مصطفی افندی و رامز افندی و تحسین افندی (۲۱) ایله
 اندرون هایونده باب السعاده یه واروب خداوندکار سابق
 سلطان سلیم خان حضرتلرینی طلب واستدعا و دارالسعاده
 آغاسنه و سائر خدمه شاهانه یه خطاب و ابرام و اخافه
 و باب السعاده مسدود اولدیغندن سقفه خروج و حرم
 هایونه هجوملرنده سلطان سلیم خانی حرم هایونده میراخور
 اول (۲۲) و خزینه و کیلی نذر آغا و سرچوقدار شهریاری

(۲۱) روسجق یاراندن مشهور تحسین محمد افندیدر .

(۲۲) محمد آغا اوچنجی سلطان مصطفی خان چوقدارلرندن

دلی ایوب آغانک اوغلیدر .



صدراعظم عالمدار مصطفى پاشا

Alèmdar Moustafa Pacha

(۲۳) و خزینه کتخداسی (۲۴) و سائر مابینجیلر ایله شهید
ایدوب بعده باب السعاده یی کشاد و سلطان سلیم خان جنت مکان
حضر تفرینک ارتحال دار بقا ایلدیکنی اخبار لرنده مصطفی
پاشا مبهوت و انکشت بردهان فکر و اندیشه یه گرفتار و یثزالدن
کلامه قدر تیاب اوله میوب بولنسان رجال و کبار نطقه
کلوب سلطان بن السلطان السلطان محمود خان افندمزی
مطلوب و سلطان محمود خان سلطان سلاطین جهان
خاقان المؤید بعون الله الملك الرحمن افندمزی بالین و الاقبال
تخت عالی بیخت عثمانیه یه اجلاس و بیعت آتما منده شوکتلو
افندمزی مهر هایونی مصطفی پاشایه احسان ایله خداوند کار
سابق سلطان سلیم خانی شهید ایدن قاتل مر قوملری
و مقربان شاهانه یی و حرم هایونده جاریه لر دن قتی وافر
نسوانی اعدام و هلاک ایلدیلر و بر معتاد والده آلا یی
و قلیج آلا یی اولوب بعده مصطفی پاشانک توابعاتی باب عالی ده
پر سلاح خدمتده قیام و رجال و کبار سکه بانلر ایله رفت
و آمده دوام و بو حرکات دن مصطفی پاشانک شجاعتی شیوع
واحادناسی اخافه و تخشیء خاص و عام ایله آنا طولی و روم
(۲۳) صدر اسبق عزت محمد پاشا کوله سی کورجی عبد -
الفتاح در . مشارالیه طرفندن سرای هایونه تقدیم ایدلمشیدی .
(۲۴) اسمی ایه سلیم اغادر .

ایلیه تحریر اتلر ابعث و تسیار و قره عثمان اوغلونی و جهان
 اوغلونی و قالیونجی دیمکله معروف بیله جک اعیسانی
 و سیروزی اسماعیل بکی و بونلرین امثالی شهرت شعار اولان
 اغواتی آستانه یه احضار و دعوت و کاغذ خانه ده حضور
 هایونه کوتوریلوب کورکار و قیوطلر الباس و سکیبان
 عسا کری تحریرینه تعهد ایتدیردیلر و بعده وطن
 اصلیه لرینه اعاده و رجعت اولندی و اول ائناده مصطفی
 کتخدا ابقا و تحسین افندی چاوشباشی و غالب افندی (۲۵)
 رئیس الکتاب و راضی افندی (۲۶) قیودان پاشا نصب و قاضی
 پاشایه (۲۷) آدم ارسال و مجدداً سکیبان عسا کری ترتیب
 و تحریر و اسکداره کوتوریلوب نظام جدید قشلا سنده اسکان
 و درگاه عالی یکیکچری اوجاغنه سکیبان مذ کوری قبول
 ایتدیریلوب بعده احاد ناسده بولنان یکیکچری اوجاغنک
 اسمیلرینی نصفی خزینه مانده و نصف آخرینی کمر کلردن
 توجیه و مصطفی پاشانک غلامدارلغنه منافی یکیکچری اوجاغنه

(۲۵) ۱۳۲۹ ده مقام صدارتی احراز ایدن غالب محمد سعید

پاشادر .

(۲۶) قریملی راضی عبدالله پاشادر . علمدار و قعه سنی متعاقب

التجا ایلدیکی روسیه دن عودتنده روس جقده ۱۳۲۸ ده قتل

ایدلشدر .

(۲۷) علائیه لی عبدالرحمن قاضی پاشادر .

چکر و نظر و یکیچری طرفندن و سائر طرفلردن فرد
واحد قیل و قال ایتمه قدرتیاب اوله میوب باب عالیده
واسواقده سکبانلر پرسالاح کشت و گذار و بو وجهله
مصطفی پاشا مسند صدارتده قرار بیت :

قنادی بیتسه بر مورک صنور خیره بشارتدر
ولی بیلمز آنی اولکیم زوالینه اشارتدر

فهواسنجه اشبو بیک ایکیوز یکرمی اوچ سنه سی
رمضان شریفنک یکرمی یدنجی قدر کیجه سی شیخ -
الاسلام صالح زاده نک قوناغنه پرسالاح سکبان ایله
افطاره عزیمت و بعده تراویحه سلطان احمد جامع شریفنه
توجه و بعد اداء صلوة باب عالی یه عودت و اول کیجه
ساعت آلتیده ایکن یکیچری طرفندن حرکت و آغا
قیوسنده یکیچری آغاسنی قتل و هلاک و صباحدر صباحدر
دیه رک خفیجه دیوان یولندن باب عالی یه سوبسو آتش
و یروب علوانداز و سحاب پرواز اولدقده مشارالیه متحیر
اولوب محزنده کندوسنی اختفا و قیوسنی سد و بند
و یکیچری دلاورلری طرف بطرف تتبع و نهایت الامر
پاشا قیوسنی کلیاً محترق و احراق تسکین و کارگیر محزنده
مختفی اولدیغنه اطلاع حاصل ایلدکلرنده لاغمجیلر ایله
محزنی هدم و حفر و مصطفی پاشا ظاهر و ایچرودن قورشوم

انداخته و بر یکی چری اوسته سنی هلاک و انجام کار کند و سنی
 باروت سیاه ایله تلف واضاعه ایلدی و بومعرکه وقوعنده
 طرف هایوندن قاضی پاشایه و رامن پاشایه آدم لر ارسال
 و نظام جدید بهادر لریله اندرون هایونه کیروب یکی چری
 عسا کرینک اوزر لرینه هجوملرینی اراده شاهانه تعلق
 و اخشام قریب اولدیغندن یکی چری دلاور لری مرام
 حاصل اولدی دیو قشالرینه عودت و افطاره مباشرتده
 ایکن بو حاله کمسنه واقف اوله میوب نظام جدید بهادر لری
 باب هایوندن خروج و دیوان یولنده دیکلی طاش قربنده
 جبهه جی قوللغنی نک اوکنه دکن بهادر لر واروب نعره لر
 ندا و بو حاله یکی چری دلاور لری واقف اولوب در عقب
 حمال ورنجبران طائفه سندن عسا کر جمع و نظام جدید
 بهادر لرینه مقابل و قتال و جنک جدال ایدرک سرای
 میداننه واروب جبخانه عامر هینی احراق بالنار و احراق
 مذکور کندو حالیه دیوان یولندن مهترخانه یی محترق
 و سلیمان پاشا خاننده قرار و تسکین و بوهنکام رامن پاشا
 معرفتیه دریادن آغاقپوسنه و سلیمانیه جامع شریفه و بغچه
 قپوسنه سفاینلردن طوپ انداخته و ماه مذکورک یکر می
 سسکزنجی و یکر می طقوزنجی کونلرنده ایکی عسکر
 مقاتله و محاربه دن خالی اولیوب حتی سرای بورنندن



امور بحريه ناظرى مورلى السيد على افندى

Esseyd Ali Effendi, Ministre de la marin
ancien Ambassadeur Ottoman près
la République Française .

یکچری دلاورلری طوپ قالدیروب دیوان یولندن اصرار
 ومصطفی کتخدانک قوناغینه انداخته ومصطفی کتخدایی
 ودقتردار تحسین افندی بی هلاک وتلف ایلدیلر وبواننده
 اندرون هایونده سلطان مصطفی خان طابه تراه حضر تلینی
 شهید ایدوب نهایت الامر نظام جدید بهادرلری پایدار
 اوله میوب قاضی پاشا ورامز پاشا وترسانه امینی مورده لی علی
 افندی (۲۸) وبهیج افندی (۲۹) کیجه حاليله دریا طرفدن عازم
 واسکدارده ولوند چفتلککنده کائن نظام جدید قشالرینی
 یکچیریلر احراق بالنار وعسا کر مذکور پراکنده
 وپریشان ومدینه اسکدارده واقع نظام جدید قشلاسنده
 قاضی پاشانک اموال واشیاسنی ونفراته ویريله جک ماهیه
 اچمه سنی بالجمله یغما وغارات وقاضی پاشا ورامز پاشا روم
 ایلی طرفه فراروزمان مروریله فراری مذکور لر جمله سی
 غضب شاهانه ایله قتل واعدام اولندیلر واشبو معرکه نک
 فرداسی کونی بیرام نمازینه زینب سلطان جامع شریفه
 تشریف هایون اولوب صلوٰه عیدی ادا ایلدیلر وبو


(۲۸) مورده لی علی افندی اهمیتی درجه سنده اشتہار ایدمه مامش
 اجاله رجالدندر . مرمق طوعی محمود پاشا تر به سی حظیره سنده دره .
 (۲۹) بهیج محمد افندی روسحق یاران دندر . غایت ذکی
 بر ذات ایدی .

حلالده شیخ الاسلام بولنان صالح زاده بی (۳۰) و سلحدار
 شهر یاری محمد بیکی (۳۱) نفی و دری زاده بی شیخ الاسلام و کیلار
 کتخداسنی سلحدار حضرت شهر یاری و چاوشباشی بولنان
 ارنا بود ممش افندی بی قائم مقام نصب و بعده مسند صدر ته
 نائل اولوب مستهک مصطفی پاشانک جسدینی محزن دن
 اخراج و مهر هایونی بولوب طرف ملو کانه یه ارسال
 و دست شاهانه یه وصولنده مشار الیه ممش پاشایه اعطا
 واحسان بیورلندی و مستهک مصطفی پاشانک آیآغینه ایپ
 طاقوب دیوان یواندن کشان بکشان میدانه ایصال و بعده
 قلعه خندقینه دفن ایلدیلر و سلطان بایزید قربنده وزنه جیلر
 ایچنده کائن والده کتخداسی یوسف آغانک قوناغی
 باب عالی اولوب بر مدت قوناق مذکور ده استقامت
 و بو وجهله مدافعه معرکه ایله استراحت اولوب بیک
 اکیوز یکر می بر تاریخندن برو جانب حجاز ده ظهور ایدن
 وهابی ملحدینک ید تسلط منخوسه سندن مدینه منوره بی
 ومکه مکرمه شرفها الله الی یوم القیامی قوت کرامت

(۳۰) صالح زاده احمد اسعد افندی شیخ الاسلام امین افندینک
 اوغلیدر . بری ۱۲۱۸ و دیکری ۱۲۲۳ ده اولق اوزره
 ایکی دفعه مقام مشیختی احراز ایلدیدی . ۱۲۳۰ ده ارتحال
 ایلدی . مفتی حمای قربنده مدفوندر .
 (۳۱) عزت علی پاشا حنفیدیدر .

شهنشاهی ایلہ مصر قاہرہ والیسی شجاعتلو محمد علی پاشا
 حضر تری تخلص واشبویک ایکویزیکرمی سکز سنہ سی
 محرم الحرامک یکرمی یدنجی کونی قبل الجمعہ مفتاح
 ذوالفلاح ورودیلہ حضرت ابا ایوب انصاری علیہ رحمۃ
 الباریدن آلائی ترتیب ورکاب کتخداسی بولنان حالت
 افدینک یدمر نعلرنده تعظیماً وتوقیراً وتکبیراً کوتوریلوب
 رکاب مستطابہ تقدیم وطریق حج فتح وکشاد وعامہ
 ناس خندان وشاد اولغلہ جناب خداوند بیچون فیابعد
 بومثللو مصائب عظیمہ لردن دولت علیہ ابدی الدوامی
 مصون وعلی الخصوص شوکتلومہابتلو کرامتلو پادشاہ عالمپناہ
 وشهنشاه ظل اللہ افندمزی سریر سلاطنتلرنده دائم
 وبرقرار وعمر ملوکانہ لرین متزاید وافزون ایلہ آمین
 بحرمة طہ ویس .

الخط باقی والعمر فانی مفہومی اوزرہ بواحفر پرقصور
 السید ابوبکر ظہور وقعہ جدیدی بروجہ محرر انشا
 وتسطیر وتحریر ایتمکله نظر ایدنلر قصور
 وکسورینی دامن عفو ایلہ مستور
 بیورملری خاصۃً نیاز
 اولنور .



فیئاتی ه غروشد ر .

و نائق سیاسیه کلیاتنک نشر ایدیله جک اجزای سائره

قیصری تاریخی

مرآت الظفر

بندر محاصره و استیلاسی

رساله ضیائییه

جام جم آیین

مصطفی راسخ افندی سفارتنامه سی

یمنی افندی سفارتنامه سی

تاریخ تیرو حسن پاشا

تاریخ وقعه ادرنه





3 1761 07130526 2

Ebūbekir, Merzifonlu
Vak'a-i cedīd

DR

559

F28